

**AKASHVANI AIZAWL**  
**REGIONAL NEWS UNIT**

**Monday, May 5, 2025**

**Time - 2:30pm - 2:35pm**



**WAQF AMENDMENT ACT**

Union Minister of State Pu Pabitra Margherita chuan Waqf Amendment Act 2025 chu hun rei tak atanga thil diklo thleng tawhte tih dikna ani a ti a, vantlang mipuite tana hamthatna a thlen theihna tura hmalakna a ni tih a sawi.

He thu hi vawiina chanchinbumite a kawmna ah sawiin Union Minister of State for Textile & External Affairs Pu Pabitra Margherita chuan Waqf Amendment Act 2025 pass chuan khawtlang nunah rorelna dik a thlen theih nan leh langtlang leh huapzo taka hmasawanna a thlen theihna tur a ni a ti a, ram mipuite chawisanna tur a ni tih sawiin Joint Parliamentary Committee member 31 ten Waqf chungchanga petition 7772 lutte thla 5 chhungin vawi 38 thutkhawmin an zirchiang a ti a, palai 282 an rawn bakah Parliament-ah darkar 25 chhung vel sawiho a nih hnuah pass chauh a ni a, hei hian mipui rorelna hmanga dan siamthat ngei a ni tih a lantir a ti bawk.

Mizorama Waqf Sudhar Jan Jagran Abhiyan Convener Pu Lalrinliana Sailo chuan vawiina Waqf siamthatin a tum ber chu India ram pumpuia Muslim ten an hman Waqf kaihnawihah rambuai leh bungraw chungchang tiamin case sing 4 dawn a awm mek a ti a, he danah hian sorkar a inrawlh theih loh avangin sorkar chuan India-a mihring awm zawng zawngte chu eng sakhaw mi pawh ni se ang khat veka dan hnuai an awm theih nan Waqf (Amendment) Bill chu a pass a ni a ti a, India ram pumpuia hemi chungchang inzirtirna hi neih vek tura tih an nih angin Mizoramah pawh he workshop hi an buatsaih tih sawiin, India-a mihring intluklanna bakah sakhua leh rinnaah thlei bik awm lova, rualkhai zawka thil tih tumna a ni tih a sawi.

Muslim dan hnuai a thlawna thumthil inpekna dan, Waqf siamthat chungchang inzirtirna, Waqf Sudhar Jan Jagran Abhiyan Workshop Programme hi Hotel Regency ah vawin khan neih a ni a, WAQF hi Islamic Law hnuai thumthil a thlawna inpek dan phung a ni a, India-ah chuan WAQF Act, 1995 hnuai hriatpui leh chuktuahrem a ni a, Islamic Law hnuai thilthlawnppek te a huam vek a, kumin April ni 4 khan Waqf siamthat rawtna, Waqf (Amendment) Bill, 2024 chu Parliament chuan a pass a, Waqf (Amendment) Act, 2025 tih a lo ni ta a ni.



## UNION MINISTER PRESS CONFERENCE

Union Minister of State for Textile & External Affairs Pu Pabitra Margherita-a'n kum 2047-a India in Ram hmasawn anih theihna tur kawng Viksit Bharat 2047 nei thei tura sorkar laipui hmalakna hrang hrang hnuaiah Mizoram chu state hmasawn anih ngei a beisei tih a sawi.

He thu hi vawiina Hotel Regency-a chanchinbumite a kawmna ah sawiin Union Minister chuan Mizoram kawngtin rengah hmasawn theihna tur a ngah hle a ti a, kum 60 liamta chhunga la thleng ngailo Prime Minister Narendra Modi-a kaihhruai hnuaiah hmasawna tam tak thleng a awm tih sawiin hmarchhak bialah pawh remna leh muanna a thleng chho mek a ti a, DoNER Ministry NEC hnuaiah hmarchhak bial hmasawna tur tam tak thawh a ni tawh tih sawiin Kar 2 dan zelah Union Minister hrang hrang chuan hmasawna hnathawh mek chu ramchhung hmun hrang hrangah a hmunah ngei tlawhin an enpui thin tih a sawi.

Union Minister chuan Mizoram chu rel kaltlangin ramchhung hmun dangte nen a inkalpawh theih tawh dawn tih sawiin railway bakah kawngpui, thlawhtheihna leh tunlai thiamna hmanga khawvel hmundang nena inpawh theihna turin hmalak mek a ni a ti bawk.



## AR LAND

Aizawl khawpui chhunga Assam Rifles chhuahsan tak ram luahzui dan tur chungchang sawihoin vawiin khan Chief Minister Pu Lalduhoma hova thutkhawm a ni a, sawiho zingah hian AR chhuansan rama Mizoram Legislative Assembly Complex din tura ruahmanna a tel.

Wawiina thutkhawm Chief Minister Conference Hall-a neih ah hian rawtna hrang hrang 16 chuang sawiho a ni a, heng zingah hian Assembly Complex AR chhuahsan rama din te leh Home Department atanga rawtla lut Assam Rifles Memorial din te leh INTACH, Mizoram Chapter atanga rawtna lut Assam Rifles cantonment building chu vawn that tura ruahmanna bakah UD&PA Department atanga rawtna Ropeway project siamna tura ruahmanna te leh Power and Electricity Department atanga rawtna Sub-Station dinna tur te chu sawiho a ni a,

Heng bakah hian Assam Rifles in Babutlanga ram an chhuahsan Zarkawt Veng Joint Action Committee kuta hlan te leh Mizoram Flourist's Association atanga rawtna Flower Market emaw Show House din te leh Aizawl Hmathlir Pawl (AHP) atanga rawtna Assam Rifles chhuahsan rama Mizoram Police duty indah te leh Assembly House din bakah Laldenga Cultural & Community Centre sak tura ruahman aiah Aizawl Green Park siam zawk ni se tia rawtna te chu sawiho tur zingah dah a ni a,

Agenda hrang hrang awmin Mizoram Gorkha Mandir Sanchalan Samiti Bazar Area, Aizawl chuan Zodin hmuna Assam Rifles Hari Mandir awm chhonzawm ni se tiin rawtna an thlen a, heng bakah hian mimak leh pawl hrang hrang atanga rawtna lut Biakin hmun Mizoram Synod hnena pek te leh Parking Lot siam tura hmalak bakah Bethlem Branch YMA atanga YMA Plantation siamna tura rawtna te chu Agenda sawiho tur zingah a tel a ni.



## HSSLC RESULT

Mizoram Board of School Education chuan naktuk May ni 6 Thawhlehi chhun dar 12:00 khian Higher Secondary School Leaving Certificate Exam result a tichhuak dawn.

Thuchhuah tarlan danin Pawl 12 Result hi MBSE Office Chaltlangah leh heng website – (a) [www.mbse.edu.in](http://www.mbse.edu.in) (b) [www.mbseonline.com](http://www.mbseonline.com)—ah te en theih a ni dawn a, A mamawh tan result bu lei theihin a awm bawk ang.

